

## **Pindaan Akta 355: Harus lebih menyeluruh, perlu rujuk pandangan pakar antarabangsa - PM Anwar**

**Astro Awani**

**15 Julai 2024**

**Firdaus Azil**

PUTRAJAYA: Pindaan terhadap Akta Mahkamah Syariah (Bidang Kuasa Jenayah) 1965 iaitu melibatkan status dan bidang kuasa di antara Mahkamah Syariah, harus dijadikan satu dokumen yang kukuh dan disepakati di antara negeri-negeri, mufti serta golongan ulama.

Perdana Menteri Datuk Seri Anwar Ibrahim berkata, setakat ini mantan Pengerusi Majlis Kebangsaan Bagi Hal Ehwal Agama Islam Malaysia (MKI) Sultan Selangor, Sultan Sharafuddin Idris Shah dan Pengerusi seterusnya Sultan Perak, Sultan Nazrin Shah bersetuju dengan kerangka awal pindaan tersebut.

Namun, katanya, beliau berpandangan pindaan tersebut perlu melalui penelitian yang penuh dan harus mendapat pandangan pakar perundangan Islam di peringkat antarabangsa.

“Dokumen ini harus menjadi dokumen penting yang boleh ditelaah pakar antarabangsa. Ini bukan dalil untuk melengah atau meremehkan usaha lalu.

"Memang kita memanfaatkan sedikit, tetapi ada kelemahan besar dalam peruntukan (lalu), jadi ia bukan saja dirujuk pada Jabatan Peguam Negara (AGC), tapi harus dirujuk pada pakar antarabangsa.

“Apabila kita perkenalkan pindaan ini, ia (menjadi) contoh terbaik pelaksanaan satu dokumen, usaha memartabatkan perundangan Islam dalam konteks negara begini, kemudian boleh dijadikan panduan, nak diserasikan kedudukan dan kekuatan Mahkamah Syariah dan Mahkamah Sivil,” katanya lagi.

Beliau berkata demikian ketika berucap merasmikan Konvensyen Memartabatkan Perundangan Syariah Di Malaysia, di sini, hari ini.

Pada Mei lepas, Menteri di Jabatan Perdana Menteri (Hal Ehwal Agama) Datuk Mohd Na'im Mokhtar berkata, Jemaah Menteri telah meluluskan cadangan untuk membentangkan pindaan terhadap Akta 355, dan Akta Tatacara MAL Mahkamah Syariah (Wilayah-Wilayah Persekutuan) 1998 (Akta 585).

Beliau berkata, pindaan tersebut bertujuan untuk memperkasakan lagi bidang kuasa Mahkamah Syariah di negara ini.

Sementara itu, Perdana Menteri berkata, dalam perbincangan dengan Sultan Nazrin, ada kesepakatan yang dicapai agar jawatankuasa khas mendapatkan pandangan pakar antarabangsa, sebelum dirujuk semula kepada AGC dan seterusnya dipersembahkan kepada Majlis Raja-raja Melayu pada Ogos ini.

“Sepanjang perbincangan saya dengan Sultan Perak, sebaiknya diangkat kepada peringkat antarabangsa, sebelum dirujuk ke AGC, dan kemudian ke sidang Majlis Raja-raja Melayu kerana soal Islam, adat, kewarganegaraan, hal-hal tertentu itu mesti mendapat kelulusan Majlis Raja-raja Melayu.

“Setakat ini saya tidak dapat lihat bantahan atau masalah daripada Ketua Hakim Negara (Tun Tengku Maimun Tuan Mat) yang merestui soal ini.

"Majlis Raja-raja sudah diberi taklimat awal dan memberi perkenan. Cuma mereka minta diteliti, jangan dilihat gopoh, pelaksanaan jangan ada kelemahan," tambahnya.

**© 2024 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-malaysia/pindaan-akta-355-harus-lebih-menyeluruh-perlu-rujuk-pandangan-pakar-antarabangsa-pm-anwar-479082>